



ՀԱՅՐԵՊԵՏԱԿԱՆ ՀԱՆԳԻՍՏՎՈՐ ՊԵՏԱՐԱԳ ԵՎ ԳԵՐՈՋ ՄԱՅՐ ՏԱՃԱՐՈՒԹ ՍՈՒՐԲ ՀԱՐՈՒԹՅԱՆ ՏՈՆԻ ԱՌԹՎ ԵՎ ԸՆԴՈՒՆԵԼՈՒԹՅՈՒՆ ՎԵՆԱՐԱՆՈՒՄ

Ապրիլի 6-ն է, կիրակի, Զատիկ:
Մայր Տաճարում նորից թնդաց խնկա-
բույր շարականների և հարության երգերի
հոգեպար և քաղցր մեղեդին:

«ՔՐԻՍՏՈՍ ՅԱՐԵԱՒ Ի ՄԵՌԵԼՈՑ»:

Զատիկ տոնն է: Ուրախ է Մայր Աթոռը,
ուրախ է Վեհափառ Հայրապետը, ուրախ են
բոլորը: Գարուն է դուրսը, գարուն է հայ հո-
գիների մեջ:

Վաղ առավոտից հավատացյալների բազ-
մությունը լցրել է Մայր Տաճարը, վանքի
շրջակայքը, էջմիածնի փողոցներն ու մայ-
թերը, մինչ նորանոր ուխտավորական խում-
բեր, խնկով և մոմերով, մատաղներով,
շտապում են դեպի Մայր Աթոռ: Զենվում են
բազմաթիվ մատաղներ: Տոնական տրամա-
դրություն է ամեն կողմ:

Մայր Տաճարը նույնպես զարդարվել է
տոնականորեն: Պայծառ փողփողում են
նորահաստատ էլեկտրական նոր ջահերը
Մայր Տաճարում, Ավագ և Իջման սեղաննե-
րի առաջ: Մոմակալներում առկաթում են
անհամար մոմեր, ջինջ արցունքներու
նման: Խնկի «թավիշ մշուշը» պարուրել է
հոգիները:

Ժամը 12-ն է: Զվարթագին և տոնական
ղողանջում են Մայր Տաճարի զանգերը: Վե-
հափառ Հայրապետը, հայրապետական լրիվ
զգեստավորման մեջ, իջնում է Մայր Տաճա-
րը, սուրբ պատարագ մատուցելու: Խուռն
բազմությունը մի պահ ալեկոծվում է խա-
ղաղ, ի տես Վեհափառ Հայրապետի: Բոլոր
շրթունքները աղոթքներ են մրմնջում: Վեհա-
փառը, Իր շուրջը օրհնութուն սփռելով,
մտնում է Մայր Տաճար:

Մայր Տաճարի երկու դասերի մեջ տեղ
են գրավել Հայկական ՍՍՌ Մինիստրների
Սովետին առընթեր Հայ նկեղեցու գործերի
խորհրդի նախագահ պր. Ս. Գասպարյանը,
խորհրդի նախագահի տեղակալ պր. Ս. Հով-
հաննիսյանը, Գերագույն Հոգևոր խորհրդի և
Վերստուգիչ հանձնաժողովի անդամները,
Հոգևոր Ճեմարանի դասախոսական կազմը,
Մայր Աթոռի օժանդակ ճարտարապետների
և ինժեներների խումբը, Մայր Աթոռի պաշ-
տոնեությունը և այլ հրավիրյալներ, ուխտա-
վորներ:

Սկսվում է հայրապետական սուրբ պա-
տարագը: Վեհափառ Հայրապետին սպա-
սարկում են գերաշնորհ Տ. Սահակ և Տ. Հայ-
կազուն սրբազանները, հոգեշնորհ Տ. Մես-

րոպ և Տ. Մուշեղ վարդապետները, Տ. Հուսիկ արեղան և Տ. Հովհաննես քահանան:

Մայր Տաճարի երգչախումբը, դաշն ու հանդիսավոր, երգում է սուրբ պատարագը: Ամեն կողմ խունկ, լույս, աղոթք և վեհություն: Քարոզում է Վեհափառ Հայրապետը, սուրբ հարության մեծ ավետիսը տալով բովանդակ հայության:

Հավարտ սուրբ պատարագի, Վեհափառ Հայրապետը նույն հանդիսությամբ առաջնորդվում է Մաղկյա Դահլիճ, ուր բազմելով Հայրապետական Գահի վրա, ընդունում է պետական պաշտոնական անձնավորությունների, Գերագույն Հոգևոր Խորհրդի, միաբանության, Հոգևոր Ճեմարանի վերատեսչության և դասախոսական կազմի, վանքի պաշտոնեական և ժողովրդի շնորհավորությունները:

Պաշտոնական այս ընդունելության ժամանակ խոսք առավ գերաշնորհ Տ. Սահակ արքեպիսկոպոսը և հանուն հայ ժողովրդի ու բոլոր ներկաների սրտագին շնորհավորեց Վեհափառ Հայրապետի Զատիկը:

Ապա Վեհափառ Հայրապետը շնորհավորեց բովանդակ հայության Զատիկը, օրհնեց Հայրենի կառավարությունը, հայ մշակույթի անխոնջ մշակներին և համայն Ազգն Հայոց: Ժամը 4-ին, Վեհաբանի սեղանատան մեջ, Ս. Զատիկի առթիվ տրվեց ճաշկերույթ:

Ավելի քան սրտահույզ էր մթնոլորտը: Ազգի սերը և Եկեղեցու խորհուրդը քով-քովի էին բերել բոլորին, ստեղծելու համար այն ջերմ մթնոլորտը, որը Վեհափառ Հայրապետի նման հավատավոր և հայրենասեր մեծ հոգու ներկայությունը կարող է ստեղծել:

Արտասանվեցին բաժակաճառեր, խղան արտասանություններ և երգեր: Վեհափառ Հայրապետը շնորհակալություն հայտնեց Իր անձի և գործի շուրջ եղած ջերմ և համակրական խոսքերի համար:

Երկու ժամ տևող այս հաճելի սեղանը մի քաղցր առիթ եղավ մի անգամ ևս ապրելու էջմիածնի անունով, Վեհափառ Հայրապետի գործով և հայ ժողովրդի սիրով:

Վեհափառ Հայրապետի Տերունական ազդեցությամբ վերջացավ զատկական այս ընդունելությունը:

